

**სსიპ - კოლეჯ „ინფორმაციული ტექნოლოგიების აკადემიის“
დუალური მიდგომით განსახორციელებელი საგანმანათლებლო პროგრამის პროფესიულ სტუდენტთა
საკვალიფიკაციო საგამოცდო კომისიის დებულება**

მუხლი 1. ზოგადი დებულებები

1. საკვალიფიკაციო საგამოცდო კომისიის დებულება შემუშავებულია „პროფესიული განათლების შესახებ“ საქართველოს კანონის, საქართველოს განათლების, მეცნიერების, კულტურისა და სპორტის მინისტრის 2019 წლის 10 აპრილის „ეროვნული კვალიფიკაციების ჩარჩოსა და სწავლის სფეროების კლასიფიკატორის დამტკიცების შესახებ“ №69/ნ ბრძანების პირველი დანართით დამტკიცებული „ეროვნული კვალიფიკაციების ჩარჩოსა“ და საქართველოს განათლების, მეცნიერების, კულტურისა და სპორტის მინისტრის 2019 წლის 19 ივნისის №128/ნ ბრძანებით დამტკიცებული „სსიპ კოლეჯ „ინფორმაციული ტექნოლოგიების აკადემიის“ წესდების“ შესაბამისად.
2. წინამდებარე დებულება განსაზღვრავს სსიპ კოლეჯ „ინფორმაციული ტექნოლოგიების აკადემიის“ საკვალიფიკაციო საგამოცდო კომისიის საქმიანობისა და პროფესიული სტუდენტებისათვის შესაბამისი პროფესიული კვალიფიკაციის მინიჭების შესახებ გადაწყვეტილების მიღების წესს.
3. სსიპ კოლეჯ „ინფორმაციული ტექნოლოგიების აკადემიის“ საკვალიფიკაციო საგამოცდო კომისიის მიზანია პროფესიულ სტუდენტთა პროფესიული ცოდნისა და კომპეტენციის ფლობის დადასტურება, სწავლის შედეგების შესაბამისობის განსაზღვრა მოდულით გათვალისწინებულ მოთხოვნებთან, მოდულური და დუალური პროფესიული საგანმანათლებლო პროგრამით განსაზღვრული კრედიტების ათვისების დადგენა და პროფესიულ სტუდენტთათვის პროფესიული კვალიფიკაციის მინიჭება.

მუხლი 2. ტერმინითა განმარტება

1. **კოლეჯი** - სსიპ კოლეჯი „ინფორმაციული ტექნოლოგიების აკადემია“.
2. **პროფესიული საგანმანათლებლო პროგრამა** - სასწავლო მიზნების, სწავლის შედეგების, მოდულის/მოდულების, შესაბამისი კრედიტების, სწავლების მეთოდების, შეფასების ფორმებისა და სასწავლო პროცესის ორგანიზების თავისებურებათა ერთობლიობა.
3. **დუალური პროგრამა** - პროფესიული საგანმანათლებლო სტანდარტის (ჩარჩო დოკუმენტის) საფუძველზე შემუშავებული პროფესიული საგანმანათლებლო პროგრამა სამუშაოზე დაფუძნებული სწავლების მიდგომით, რაც გულისხმობს სავალდებულო პროფესიული მოდულებით გათვალისწინებული სწავლის შედეგების 50%-ის ან მეტის რეალურ სამუშაო გარემოში მიღწევას პარტნიორ საწარმოსთან გაფორმებული ურთიერთანამშრომლობის ხელშეკრულების ფარგლებში.
4. **პროფესიული საგანმანათლებლო სტანდარტი** - დოკუმენტი, რომლითაც განისაზღვრება მისანიჭებელი კვალიფიკაცია/კვალიფიკაციები, შესაბამისი კვალიფიკაციის/კვალიფიკაციების მისანიჭებლად საჭირო კრედიტების რაოდენობა, მისაღწევი სწავლის შედეგები, იმ მოდულების ერთობლიობა, რომლებით განსაზღვრული სწავლის შედეგების მიღწევა აუცილებელია კვალიფიკაციის/კვალიფიკაციების მისანიჭებლად, შესაბამის საგანმანათლებლო პროგრამაზე/საგანმანათლებლო პროგრამებზე დაშვების და ამ პროგრამის/პროგრამების განხორციელების წინაპირობები, დასაქმების სფეროები და საგანმანათლებლო პროგრამის/საგანმანათლებლო პროგრამების შემუშავებასა და განხორციელებასთან დაკავშირებული მოთხოვნები (მათი არსებობის შემთხვევაში).

5. **მოდული** – პროფესიული საგანმანათლებლო სტანდარტის ფარგლებში არსებული ან დამოუკიდებლად შემუშავებული კომპონენტი, რომელიც აერთიანებს ერთმანეთთან ლოგიკურად დაკავშირებულ სწავლის შედეგებს, აღწერს მათი მიღწევის გზებს, საშუალებებსა და დადასტურების პირობებს.
6. **კომპეტენცია** – სწავლის შედეგების შესაბამის კონტექსტში (სწავლის ან საქმიანობის პროცესში, პიროვნული და პროფესიული განვითარებისათვის) ადეკვატურად გამოყენების შესაძლებლობა.
7. **კრედიტი** – ერთეული, რომელიც მოიცავს დადასტურებული სწავლის შედეგების ერთობლიობას, რომელიც შესაძლებელია საქართველოს კანონმდებლობით დადგენილი წესით იქნეს აღიარებული ერთი ან რამდენიმე კვალიფიკაციის მისაღებად.
8. **კვალიფიკაცია** – უფლებამოსილი დაწესებულების/დაწესებულებების მიერ სწავლის შედეგის მიღწევის შეფასებისა და დადასტურების ფორმალური შედეგი, რომელიც დასტურდება სახელმწიფოს მიერ აღიარებული სერტიფიკატით, უმაღლესი ან პროფესიული განათლების დამადასტურებელი სახელმწიფო დოკუმენტით – დიპლომით ან ზოგადი განათლების დამადასტურებელი სახელმწიფო დოკუმენტით.
9. **საკვალიფიკაციო გამოცდა** – დუალური მიდგომის პროფესიული საგანმანათლებლო პროგრამის პროფესიული სტუდენტისათვის კვალიფიკაციის მინიჭება ხორციელდება საკვალიფიკაციო გამოცდის ჩატარებით.
10. **დიპლომი** - უფლებამოსილი დაწესებულების მიერ მინიჭებული კვალიფიკაციის დამადასტურებელი დოკუმენტი.
11. **დიპლომის დანართი** – დოკუმენტი, რომელსაც დიპლომთან ერთად გაცემს საგანმანათლებლო დაწესებულება პროფესიული სტუდენტის მიერ მიღებული განათლების შინაარსის დასადასტურებლად.

მუხლი 3. საკვალიფიკაციო საგამოცდო კომისიის შექმნა

1. პროფესიული კვალიფიკაციის მინიჭებას ახორციელებს არანაკლებ 3 (სამი) წევრისაგან შექმნილი ერთჯერადი საკვალიფიკაციო საგამოცდო კომისია, რომლის შემადგენლობაც განისაზღვრება კოლეჯის დირექტორის ინდივიდუალური ადმინისტრაციულ-სამართლებრივი აქტით (კომისიაში მინიმუმ 1 წევრი უნდა იქნეს წარმოდგენილი პარტნიორი ორგანიზაციიდან).
2. საგამოცდო კომისიაში არ უნდა შედიოდეს პირი, რომელიც მონაწილეობდა გამოსაცდელის სწავლების პროცესში.
3. საკვალიფიკაციო საგამოცდო კომისიის წევრისათვის უფლებამოსილების შეწყვეტის შესახებ გადაწყვეტილებას იღებს კოლეჯის დირექტორი.
4. საკვალიფიკაციო საგამოცდო კომისიის შემადგენლობაში შედიან კომისიის თავმჯდომარე, კომისიის მდივანი და წევრები.
5. საკვალიფიკაციო საგამოცდო კომისია იკრიბება შესაბამისი პროფესიული საგანმანათლებლო პროგრამის სასწავლო ჯგუფის მიერ სწავლის დასრულებიდან გონივრულ ვადაში.

მუხლი 4. საკვალიფიკაციო საგამოცდო კომისიის მიერ გადაწყვეტილების მიღების წესი

1. საკვალიფიკაციო საგამოცდო კომისიის სხდომა უფლებამოსილია, თუ მას ესწრება კომისიის წევრთა ნახევარზე მეტი. კომისიის თითოეულ წევრს აქვს ერთი ხმის უფლება.
2. საკვალიფიკაციო საგამოცდო კომისია მის კომპეტენციას მიკუთვნებულ საკითხებზე გადაწყვეტილებას იღებს კომისიის სხდომაზე დამსწრე წევრთა უმრავლესობით. ხმათა თანაბრად გაყოფის შემთხვევაში გამამწყვეტია კომისიის თავმჯდომარის ხმა.

3. კომისიის სხდომაზე მიღებული გადაწყვეტილება ფორმდება კომისიის სხდომის ოქმით, რომელსაც ხელს აწერენ კომისიის თავმჯდომარე, კომისიის მდივანი და კომისიის წევრები. კომისიის წევრს უფლება აქვს თავისი განსხვავებული აზრი დაურთოს ოქმს, რის შესახებაც ოქმში კეთდება შესაბამისი ჩანაწერი.

მუხლი 5. პროფესიული სტუდენტისათვის კვალიფიკაციის მინიჭების წესი

1. პროფესიული სტუდენტისათვის პროფესიული კვალიფიკაციის მინიჭების საფუძველია პროფესიული საგანმანათლებლო პროგრამით განსაზღვრული კრედიტის სრულად ათვისება, რაც დასტურდება შესაბამისი პროფესიული საგანმანათლებლო პროგრამის ყველა მოდულში დადებითი შეფასების მიღებით ან/და კრედიტების აღიარებით.
2. პროფესიული საგანმანათლებლო პროგრამით განსაზღვრული კრედიტების სრულად ათვისების ან აღიარების შემდეგ პროფესიული სტუდენტისათვის პროფესიული კვალიფიკაციის მინიჭება ხორციელდება საკვალიფიკაციო საგამოცდო კომისიის მიერ, რაც ფორმდება კომისიის სხდომის ოქმით და დასამტკიცებლად წარედგინება კოლეჯის დირექტორს.
3. კონკრეტული პროფესიული საგანმანათლებლო პროგრამის სპეციფიკის გათვალისწინებით, საკვალიფიკაციო გამოცდის საკითხებს ადგენს კომისია, რომელიც მოიცავს:
 - 3.1. დავალების შინაარსს;
 - 3.2. დავალების შესრულების დროს;
 - 3.3. შეფასების კრიტერიუმებს;
 - 3.4. დავალების შესრულების პირობებს;
 - 3.5. დავალების შესასრულებლად საჭირო ინვენტარს, ინსტრუმენტებსა და აღჭურვილობით უზრუნველყოფას;
4. სხვა საჭიროებებს გამოცდის სპეციფიკიდან გამომდინარე.
5. პროფესიული კვალიფიკაციის მინიჭება დასტურდება კოლეჯის მიერ გაცემული დიპლომით.
6. პროფესიული კვალიფიკაციის მინიჭების შემდგომ კურსდამთავრებულის მონაცემები აისახება საგანმანათლებლო დაწესებულებათა რეესტრში.

მუხლი 6. საკვალიფიკაციო საგამოცდო კომისიის შედეგების გასაჩივრება

საკვალიფიკაციო საგამოცდო კომისიის გადაწყვეტილება პროფესიული სტუდენტისათვის შესაბამისი პროფესიული კვალიფიკაციის მინიჭების თაობაზე შესაძლოა გასაჩივრდეს საქართველოს კანონმდებლობით დადგენილი წესით.